

# Pol da Epesas Amin do Papia Mandagit

## But piso gen

On papia dakon mibilisi unun yaŋ: Piŋkop da yo morap kisi Kristo do paŋmuwutdisak. Unun Kwen Kokup ae miktim dakon yo morap kisi paŋmuwuk iban Kristo da yo morap dakon busuŋi yitdisak (1.10). Ae Piŋkop da iyi dakon miŋat aminyo paŋtagap aban Kristokon gadaŋ kimagek but kaloŋsi egiŋni do nandisak.

Pol da on papiakon mibiltok Piŋkop dakon nandaŋ yawot da Kristo nandaŋ gadaŋ imaŋ miŋat aminyo paŋpuluŋaŋban miŋat amin kabi kaloŋsi awit do yosok. Yesu da pi agit unun do aŋek Piŋkop da miŋat aminyo yokwikon baŋ timikgit. Ae Telagi Wup yomgut unun da yo tagisi morap aŋ yom do yaŋ teban tok agit unun akdisak yaŋ nolisak (1.14). Ae gen unun da buŋon mandagit unun Pol da Yesu yolyol amin Kristo gat gadawit, do but kaloŋsi egek Piŋkop dakon aŋpak ani do yosok.

On papiagwan miŋat aminyo Kristokon gadawit aŋek kabi kaloŋsi awit unun do Pol da miŋat aminyo da nandaba pisoni do tilak genon da yosok. Yaŋ yosok, Piŋkop dakon miŋat aminyo unun giŋtim kaloŋsi yombem aŋakwa Kristo unun giŋtim unun dakon busuŋi (4.1 16). Ae Piŋkop dakon miŋat aminyo unun yut kinda yombem aŋakwa Kristo unun yut unun dakon gwak teban akdak (2.19 22). Ae Piŋkop dakon miŋat aminyo unun miŋat kinda yombem aŋakwa Kristo unun miŋat unun dakon eni yombem (5.22 32). On papia da Piŋkop da miŋat amin kabinikon yo tagisi aŋ yom do nandisak unun do yosok.

---

## Kristo do aŋek Piŋkop da nin paŋkaluk agit

*(Kilapmi 1–3)*

**1** <sup>1a</sup>Nak Pol, Yesu Kristo dakon yabekbini. Iyi da galak togon Piŋkop da yabekbi pi namgut. Papia on telagi paŋmuwukbi kokup pap Epesas egek Yesu Kristo yol kimokgoŋ amin ji do mandisat. <sup>2</sup>Piŋkop Datnin gat ae Amin Tagi Yesu Kristo gat unun da nandaŋ yawok damiŋek butji paŋyawot aban yawori tosak.

---

<sup>a</sup> 1.1 Ya 18.19-21; 19.1

**Kristo do aŋek Piŋkop da Kwen Kokup dakon yo tagisi nimisak**

<sup>3</sup><sup>b</sup>Amin Tagi Yesu Kristo dakon Piŋkopni ae Datni aŋkisineŋ. Nin Kristo dakon amin kabi agimaŋ uŋun do aŋek nin gisamigeŋ wupnin paŋpuluŋok do Kwen Kokup dakon yo tagisi morap nimgut. <sup>4</sup><sup>c</sup>Nin telagi egiŋneŋdo, kalipsigwan miktim Piŋkop da dima wasaŋban noman taŋakwan Yesu gat gadat gadat aneŋ do kilisi manjigit. Telagisi egeŋ Piŋkop da dabilon miŋat aminyo gulusuŋni mini da egiŋneŋ do agit. <sup>5</sup><sup>d</sup>Kalipsigwan nin do but dasi galak taŋ nimeŋek Yesu Kristo do aŋek iyi dakon monji egiŋneŋ do manjiŋ nimgut. Uŋun iyi dakon galaktok yolek yaŋ agit. <sup>6</sup><sup>e</sup>Monji uŋun but dasi galak taŋ imisak uŋun da manon, Piŋkop da nin do nandaŋ yawot madepsi yumsi agit. Do nandaŋ yawotni madepsi uŋun do nandaŋek Piŋkop dakon man aŋkisiŋ kimotneŋ.

<sup>7</sup><sup>f</sup>Nandaŋ yawotni uŋun wagil tugok tugogisi. Kristo nin ae yumaŋ nip do kili kimagŋit, ae yawini baŋ Piŋkop da yokwinin kisisi wiririk nimgut. <sup>8</sup><sup>g</sup>Piŋkop da nandaŋ yawotni ninon madepsi tagalgit. Ae nandak nandak tagisi mibili mibili morapmi gat, ae nandaŋ kokwin kilegisi gat nimgut. <sup>9</sup><sup>h</sup>Kalip Piŋkop da Kristo da pi asak uŋun do aŋek yo uŋun yaŋ abeŋ yaŋ kili nandagit. Mani nandak nandakni uŋun pasili tagit, abisok ninon kili paŋalon agit. <sup>10</sup><sup>i</sup>Yo uŋun akdisak uŋun yaŋ: iyi bisap yipguron yo morap Kwen Kokup toŋ ae miktimon toŋ uŋun yo morap kisi Kristo do paŋmuwutdisak. Aŋakwan Kristo da yo morap kisi dakon busuŋi yitdisak.

<sup>11</sup><sup>j</sup>Piŋkop da iyi dakon galaktok ae nandak nandak yolek yo morap aŋakwan noman toŋ. Ae iyi da galak togon kalipsigwan Juda amin nin Kristokon gadaŋek Piŋkop dakon miŋat amin kabisi aneŋ do kili manjigit. <sup>12</sup><sup>k</sup>Juda amin nin da mibiltok butnin Kristokon yipmaŋek yolgimaŋ. Ae nin da bisapmi bisapmi Piŋkop dakon tilim madepni do nandaŋek mani aŋkisineŋ do nin manjigit.

<sup>13</sup><sup>l</sup>Ae Amin Iŋwakŋwari Kabi jiyo kisi gen bami kili abidawit. Uŋun Piŋkop dakon Gen Bin Tagisi ji yokwikon baŋ timikgit uŋun. Ji Kristo kili nandaŋ gadaŋ imgwit, aŋakwa Piŋkop da yaŋ teban tok kalip agit uŋun yolek ji do Telagi Wup damgut. Uŋun da iyi dakon miŋat amin bamisi awit dakon tilak asak. <sup>14</sup><sup>m</sup>Nin Telagi Wup kili abidagimaŋ, do nandamaŋ, Piŋkop da miŋat amin kabini do yo tagisi morap diwari yom do yaŋ teban tok agit uŋun gat kisi yomdisak. Nin Piŋkop da timikban iyi gat kisi egiŋneŋ bisapmon yo uŋun timitdamaŋ. Aŋek nin Piŋkop dakon tilim madepni do nandaŋek mani aŋkisiŋkamaŋ.

**Pol da Epesas amin Piŋkop da nandak nandak yomjak do bisit agit**

<sup>15</sup><sup>n</sup>Ji Amin Tagi Yesu nandaŋ gadaŋ imiŋek Piŋkop dakon miŋat aminyo morap but dasi galak taŋ yomaŋ dakon geni nandagim. <sup>16</sup><sup>o</sup>Do bisit

<sup>b</sup> 1.3 Ep 2.6   <sup>c</sup> 1.4 Jn 15.16   <sup>d</sup> 1.5 Jn 1.12   <sup>e</sup> 1.7 Ep 2.7; Kol 1.14   <sup>f</sup> 1.9 Ro 16.25  
<sup>g</sup> 1.10 Kol 1.16,20   <sup>h</sup> 1.11 Ro 8.28-29   <sup>i</sup> 1.14 2Ko 1.22

asat bisapmon, yipman deri mini ji do nandaneq Piŋkop ya yan iyisat. <sup>17</sup>Janeq Amin Taginin Yesu Kristo dakon Piŋkop da ji paŋpulugosak do bisit asat. Uŋun Datnin tilimni madepsi. Uŋun da nandak nandak kilegi damineq paŋtagap aban pakyaŋsi nandan imni. <sup>18</sup>Nak but dabiljikon terenje yipjak do bisit asat. Aban yo uŋun ji da abidoni do yan damgut uŋun tagisi nandaba pisosak. Yo uŋun ji da jomjom anekwan uŋun. Yan aban Piŋkop da yo wagil tilimi tonji uŋun iyi dakon miŋat aminyo nin do manjigit uŋun nandano pisosak. <sup>19</sup><sup>k</sup>Ae yan nandakdan. Piŋkop dakon tapmim uŋun bisapmi bisapmi miŋat aminyo nandan gadan imaman uŋun paŋpulugosak dakon tapmim uŋun wagil madepsi. Nin da tapmimni aripmi dima kokwinitneq. Piŋkop dakon tapmim madepni ninon pi asak, <sup>20</sup><sup>l</sup>uŋun dagin kalip Kristokon pi agit. Kristo kimakban Piŋkop dakon tapmim madepnikon da Piŋkop da aban pidaŋban awigi Kwen Kokup iyi da amin tet do yipban yikgit. <sup>21</sup><sup>m</sup>Yigek yo morap kwen toŋ uŋun dakon wukwisi egisak. Wup tapmimi toŋ mibili mibili, ae kila amin morap, ae yo morap tapmimi toŋ dakon wukwisi egisak. Kila amin morap abisok ekwan ae don egipdan kisi dakon wukwisi egisak. <sup>22</sup><sup>n</sup>Piŋkop da yo morap Kristo da kandap mibilgwan yopmanek yipban yo morap dakon busuŋi yikgit. Yan agit do paŋmuwukbi dakon busuŋi yikdak. <sup>23</sup><sup>o</sup>Paŋmuwukbi uŋun Kristo dakon giptimni. Kristo uŋun yo morap kisikon egek tugaŋ yomisak. Ae paŋmuwukbini kisikon wagilsi tugaŋ yomisak.

### Kristo da pi agit do anek nin egip egip abidagiman

**2** <sup>1</sup><sup>p</sup>Kalip ji gulusuŋ mibili mibili gat ae yokwi mibili mibili gat aba uŋun da dikba wupji kimak mudawit. <sup>2</sup><sup>q</sup>Uŋun bisapmon ji on miŋtim dakon anpak yokwikon agipgwit. Ji kundukon wup yokwi ekwan dakon kila amini dakon anpakni yolgwit. Uŋun kila amin Piŋkop dakon gen pabiŋ yopmanan amin da but kagagwan egek pi asak. <sup>3</sup><sup>r</sup>Kalip nin morap kisi uŋun amin kabi gat egipguman. Nin but kalipnin dakon galaktok yokwi ae nandak nandak yokwi yolguman. Yan si egipguman bisapmon Piŋkop da tomni yokwisi miŋat amin morap anpak unuden an da abidoni do anoman agit uŋun abidogi.

<sup>4-5</sup><sup>s</sup>Asi, yokwinin da nindapba kimak mudagiman. Nin amin wagil kimakbi da tilak egipguman, mani Piŋkop dakon bupmini uŋun tugok tugogisi, ae nin do but dasi galak taŋ nimgut. Aban Kristo gat kisi egip egip abidagiman. Asi, Piŋkop dakon nandan yawotni do anek ji yokwikon baŋ timikgit. <sup>6</sup><sup>t</sup>Piŋkop da nin Yesu Kristo gat kisi kimoron baŋ paban

j 1.17 Kol 1.9    <sup>k</sup> 1.19 Kol 1.11    <sup>l</sup> 1.20 Kap 110.1; 2Ko 13.4; Kol 2.12    <sup>m</sup> 1.21 Kol 1.16; 2.10    <sup>n</sup> 1.22 Kap 8.6    <sup>o</sup> 1.23 Ro 12.5; Ep 4.10,15; Kol 1.18    <sup>p</sup> 2.1-5 Kol 1.21; 2.13  
<sup>q</sup> 2.2 Kol 3.7; Tit 3.3    <sup>r</sup> 2.3 Kol 3.6    <sup>s</sup> 2.4-5 Ro 6.11-13    <sup>t</sup> 2.6 Kol 2.12

pidagiman. Yan ahek nin Kristo gat kisi Kwen Kokupmon kila amin madep yityit tamokon kili nipban yikgiman. <sup>7</sup>Yesu Kristo da pi agit do ahek ninon yo tagisi unun agit. Nido, miñat aminyo don egi anan kikdan unun da nandan yawot madepni unun yolik do nandagit. <sup>8</sup>Ji Yesu Kristo nandan gadan imgwit, anakwa Pinkop dakon nandan yawotni dogin ahek Pinkop da ji yokwikon ban timikgit. Unun ji da disi dima awit. Pinkop isalsi but galak do ji do agit. <sup>9</sup>Unun pi kinda awit dakon yuman nogi dima. Do amin kinda da iyi dakon man aripmi dima awigisak. <sup>10</sup>Yesu Kristo do ahek Pinkop da aban nin miñat aminyo kalugi agiman. Nin da yo tagisi anan dakon kosit Pinkop da kili anoman agit unun nan agipneñ do yan agit.

**Kristo da kabi bamori uwal uwalon egipguman  
unun panmuwukban kabi kalonji agiman**

<sup>11</sup>Ji disi nandan, Juda amin wili dakon giptim mandanek ji do “Giptimni dima mandan amin” yan yon. Unun amin dagan giptimnikon wasok an unun do yosok. Pakyanñi nandani, kalip ji Amin Iwakñwari Kabikon da altawit. <sup>12</sup>Unun bisapmon ji Kristo gat dima gadanji. Ji Israel amin kabi da wanga egipgwit. Pinkop da yan teban tok ahek sanbek sanbek Israel amin gat anakwan ji unun amin kabi da wanga egipgwit. On miktimon egek yo tagi kinda tosok do don noman tokdisak yan nandanek jomjom dima awit. Ji Pinkop dima nandan imgwit. <sup>13</sup>Kalip ji dubagisikon egipgwit, mani abisok Kristo dakon yawi do ahek ji Yesu Kristo gat gadawit da Pinkop da kapmatsisok ekwan. <sup>14</sup>Kristo da iyi aban nin but yawot egek kalonji ekwaman. Kalip Juda amin ae Amin Iwakñwari Kabi uwal uwal ahek egipgwit. Unun uwal uwal anpakni da Juda amin ae Amin Iwakñwari Kabi da binapmon dam da yan tagit. Mani Kristo giptimni paregek dam unun wagil tuwilek uwal uwal anpak unun anmilip agit. <sup>15</sup>Unun da Juda amin dakon gen teban gat ae gen tebani monin monin diwari morap gat kisi wiririk mudagit. Unun da amin kabi bamori panmuwukban amin kalonji kinda kalugi asak unun do ahek yan agit. Yan aban but kalonji agiman. <sup>16</sup>Kabi bamot unun giptim kalonikon panmuwugek Pinkopmon panop do ahek tilak kindapmon kimakgit. Ae tilak kindapmon uwal uwal unun kalip tagit unun anakban kimakgit. <sup>17</sup>Unun abineñ but yawot dakon gen yan tenjenagit. Gen unun Amin Iwakñwari Kabi ji Pinkop da dubagikon egipgwit gat ae Juda amin nin kapmatjok egipguman amin gat kisi do yan tenjenagit. <sup>18</sup>Nin but kalonji ekwaman, nido Kristo obakon da nin kabi bamori kisi Wup kalonji da Daron tagi kineñ dakon kosit yipman nimisak.

<sup>u</sup> 2.9 1Ko 1.29-31; 2Ti 1.9    <sup>v</sup> 2.10 Tit 2.14    <sup>w</sup> 2.12 Ro 9.4; Kol 1.21    <sup>x</sup> 2.13 Kol 1.20  
<sup>y</sup> 2.14 1Ko 12.13    <sup>z</sup> 2.15 Kol 2.14    <sup>a</sup> 2.16 Sek 9.10; Kol 1.20,22    <sup>b</sup> 2.17 Ais 57.19

### Paŋmuwukbi morap nin Piŋkop dakon yutni

<sup>19c</sup>Telagi Wup da kosit yaŋ yipmaŋ nimisak, do ji abisok binap amin miŋtimni mini da tilak dima ekwaŋ. Ji Piŋkop dakon miŋat aminyo gat kabi kaloni ekwaŋ. Ji Piŋkop dakon miŋat amin kabi ekwaŋ. <sup>20d</sup>Ji yut kinda yombem, Piŋkop da witjigit. Uŋun da yabekbi nin gat ae kombi amin gat baŋ yut uŋun dakon gwak yaŋ magit. Ae yut kodigikon gwak teban tip kindanaŋ tidawit uŋun Yesu Kristo. <sup>21e</sup>Yut uŋun dakon kidari Kristokon gadawit do aŋek kisi morap tagisi gadaŋek toŋ. Piŋkop da yut uŋun sigin witjijakwan yut uŋun Amin Tagi dakon telagi yut asak. <sup>22f</sup>Jiyo kisi Kristokon gadaŋba Piŋkop da miŋat amini gat paŋmuwukban Piŋkop dakon yutni awit. Piŋkop Telagi Wupmon da uŋun yutnon egisak.

### Pol Amin Iŋwakŋwari Kabikon Gen Bin Tagisi yaŋ teŋteŋosak dakon pi taŋ imisak

**3** <sup>1g</sup>Nak Pol dam tebanon yikdat, nido Amin Iŋwakŋwari Kabi ji paŋpulugok do aŋek Yesu Kristo dakon pi asat. <sup>2h</sup>Nak gen on kili nandawit yaŋ nandisat, uŋun yaŋ: Piŋkop da ji do aŋek nak do nandaŋ yawok naminek pi uŋun abeŋ do nak manjigit. <sup>3i</sup>Piŋkop da yo agit dakon geni kalip pasili tagit, mani nagon paŋalon agit. Uŋun dakon geni disok kili mandat. <sup>4</sup>Ae gen on manjini bisapmon Kristo da pi uŋun agit dakon gen pasili Piŋkop da noligit uŋun dakon mibili nandani. <sup>5</sup>Kalip bisap morapmi, Piŋkop da gen pasili on nomansi dima yaŋ teŋteŋagit. Mani abisok Wupmon da Piŋkop da telagi yabekbini gat ae kombi amini garon yoyiŋ teŋteŋosok. <sup>6j</sup>Gen pasili uŋun yaŋ: Gen Bin Tagisikon da nin giptim kaloni aŋek Amin Iŋwakŋwari Kabi gat Israel amin kabi gat kisi da Piŋkop da yo nim do yagit uŋun timitdamaŋ. Ae Piŋkop da Yesu Kristo do aŋek yaŋ teban tok agit dakon bami kisin da timitdamaŋ. <sup>7k</sup>Piŋkop da nak aŋtagap aban Gen Bin Tagisi dakon oman amin dagagim. Nandaŋ yawok naminek aŋteban aban pi uŋun abeŋ dakon tapmimni namgut. <sup>8l</sup>Nak Piŋkop dakon miŋat amin morapyo dakon piŋbinisi egisat, mani nandaŋ yawok naminek pi uŋun namgut. Pi uŋun Amin Iŋwakŋwari Kabikon Gen Bin Tagisi yaŋ teŋteŋokeŋ. Gen Bin Tagisi uŋun Kristo da nin do yo tagisi morap agit da asak, amin nin da ariŋmi dimasi kokwinigek manjineŋ uŋun do yosok. <sup>9</sup>Piŋkop da yo morap wasagit, mibiltok yo morap ak do nandagit dakon nandak nandakni si aŋkisiŋigit. Yaŋ aban kalip bisap morapmi nandak nandak uŋun pasili tagit. Mani, abisok nandak nandakni uŋun nomansi yaŋ teŋteŋokeŋ

<sup>c</sup> 2.19 Ep 3.6   <sup>d</sup> 2.20 1Ko 3.11   <sup>e</sup> 2.21 1Ko 3.16   <sup>f</sup> 2.22 1Pi 2.5   <sup>g</sup> 3.1 Pil 1.7,13

<sup>h</sup> 3.2 Kol 1.25   <sup>i</sup> 3.3 Ep 1.9-10; Kol 1.26   <sup>j</sup> 3.6 Ep 2.13,16-19   <sup>k</sup> 3.7 Kol 1.25

<sup>l</sup> 3.8 1Ko 15.9-10

do pi namgut. <sup>10</sup>Kalip si an̄kisibigit, mani abisok paŋmuwukbini aban noman taŋakwan nandan̄ kokwin tagisi gat nandak nandakni gat aban teŋteŋosok. Aban aŋelo tapmimi toŋ gat ae Kwen Kokup dakon wup gat da Piŋkop dakon nandak nandak nandaba p̄sosok. <sup>11</sup>Kalip Piŋkop da iyi yo uŋun ak do nandagit, abisok Yesu Kristo Amin Taginin da pi agiron uŋudon kili agit. <sup>12</sup>"Nin Kristo nandan̄ gadan̄ imiŋek iyikon gadan̄ek dima pasolneŋ. Kristo uŋun Piŋkopmon kin̄ altoneŋ dakon kositnin, yan̄si nandan̄eŋ. <sup>13</sup>Yan̄do, nak abisok yan̄ dayisat, nak ji paŋpulugok do aŋek tepmi pasat uŋun do butjik dima pani. Yo uŋun noman tak uŋun do kisik kisik ani. Nido, uŋun da ji paŋpulugan̄ban Piŋkop gat tagisi egipdan̄.

### Pol da Epesas amin tebaisi atni do bisit agit

<sup>14</sup>Nak Dat da yo agit uŋun do nandan̄ek ŋwakbeŋ aŋ imisat. <sup>15</sup>Uŋun da miŋat amin kabi morap Kwen Kokup ae miktimon ekwan̄ uŋun wasagit. <sup>16</sup>Nak ŋwakbeŋ aŋek bisit yan̄ asat, Dat da yoni wagil tagisisi ban̄ ji paŋteban aŋek Telagi Wupmon da tapmim damiŋakwan tebaisi atni. <sup>17</sup>"Aŋakwan nandan̄ gadatji do aŋek Kristo butjikon egipjak. Aŋakwan amin do but dasi galak taŋ yomyom aŋpagon gelji tebai yipba piŋakwan atni. <sup>18-19</sup>Aŋek ji Piŋkop dakon miŋat amin morap gat kisi tapmim paŋek Kristo da amin do but dasi galak taŋ yomisak uŋun do pakyansi nandaba p̄sosak. Uŋun madep daman. Hlalogini uŋun madepsi, ae dubagisisi kisak, ae kwensi wigisak, ae mibilisigwan piŋisak. Asi, Kristo da amin do but dasi galak taŋ yomisak, uŋun da nandak nandak morap kisi yapman̄dak, mani ji da tagi nandaba p̄sosak. Yo tagisi morap Piŋkop iyikon tugaŋ toŋ, uŋun jiyo kisikon tugaŋ toni.

<sup>20</sup>Piŋkop iyi dakon tapmim nin da buron pi asak, ae uŋun tapmim da nin dakon nandak nandak yapman̄ mudosok. Yo morap Piŋkop da asak do bisit iyaman̄, uŋun tapmimni da arip dimasi. <sup>21</sup>Do dagok dagogi mini paŋmuwukbi miŋat aminyo Yesu Kristo da manon Piŋkop dakon man aŋkisiŋ kimotni. Don babikon da babikon yan̄ gin taŋ aŋaŋ kisak teban. Uŋun asi.

## Nin Kristo dakon giptimni ekwaman̄ do Piŋkop dakon aŋpak aneŋ

(*Kilapmi 4–6*)

### Nin Kristo dakon giptimni ekwaman̄

**4** <sup>1</sup>Nak Pol dam tebanon egisat, nido Amin Tagi dakon pi asat. Piŋkop yol kimotni do yan̄ damgut, do butji pabo pisaŋakwan

<sup>m</sup> 3.12 Jn 14.6; Ro 5.2    <sup>n</sup> 3.17 Jn 14.23; Kol 1.23; 2.7    <sup>o</sup> 4.1 Kol 1.10

anjpak iyi nandisak unjun anj kimotnidosi dayisat. <sup>2</sup>Ji paŋmuwukbi diwari dakon piŋbini egek anjak yaworisi anj yomni. Yokwi anjamni bisapmon butji yawori tanjakwa but dasi galak tanj yomiŋek butjap tepmi dima nandanj yomni. <sup>3</sup>Telagi Wup da but kalonj egipneŋ dakon anjak nimiŋakwan but yawot da nap da yanj waban kabi kalonjisi ekwamanj. Ji unjun anjak abidok do tapmimji kisi unjun do paretni. <sup>4</sup>Nin kisi Wup kalonj gin abidagimanj, ae nin giptim kalonj. Piŋkop da ji yo kalonj kinda dogin jomjom ani do yanj damgut. <sup>5</sup>Amin Tagi unjun kalonj gin, ae nandanj gadat unjun kalonj, ae telagi pakbi sogok unjun kalonj gin. <sup>6</sup>Piŋkop kalonj gin unjun nin morap kisi dakon Datnin. Unjun miŋat amin morap dakon wukwini, ae miŋat amin morap da binapmon pi asak, ae miŋat amin morap da butgwan egisak.

<sup>7</sup>Mani Kristo da but galak do yo madepsi nimgut unjudeŋ gin Piŋkop da nin morap kalonj kalonj do nandanj yawotni nimiŋ nimiŋ agit. <sup>8</sup>Mibili yanj do Piŋkop dakon gen da yanj yosok:

“Unjun kwensi wigek amin morapmi iyi teban tanej timikgit unjun timikban kisi wigiwit.

Wigek amin do but galak do yo yomgut.”

<sup>9</sup>“Unjun kwensi wigigit” yanj gen tim tosok, unjun da yanj nolisak, Kristo unjun kwen gin dima wigigit. Unjun mibiltok miktim dakon diwari mibilisigwan kisi pigigit. <sup>10</sup>Unjun amin mibiltok mibilikon pigigit, unjun kwen yo kisi wigigit. Unjun yo morap kila ani ak do anek Kwen Kokup morap da kwensi wigigit. <sup>11</sup>Unjun da but galak do yo yanj banj yomgut: Amin diwari yabekbi pi ani do yomgut, ae amin diwari kombi amin pi yomgut, ae amin diwari aminon Gen Bin Tagisi yanj tenjenok ani do pi yomgut, ae amin diwari pasto pi yomgut, ae diwari yoyiŋdet pi yomgut. <sup>12</sup>Yoban unjun da paŋmuwukbi paŋtagap aba Piŋkop dakon pi anjakwa Kristo dakon giptim teban tanej tagisi tosak. <sup>13</sup>Pi unjun sigin tanj anjan kinakwan wigi nin morap kisi but kalonjisi egek nandanj gadat bamisi anek Piŋkop dakon Monji pakyaŋsi nandanj imneŋ. Yanj anapano paŋmuwukbi egip egipnin teban tanjakwan Kristo iyi dakon anjak tagisi, unjun dakon tilak abidoneŋ.

<sup>14</sup>Anej nin amin moniŋ da aripmon sanjenek dima egipneŋ. Anej amin paŋgalak anj amin, ae amin paŋkewal, ae top dakon mibili pakyanj nandanj amin unjun dakon geni da ji dakon nandak nandak paŋki paŋabiŋ paŋabiŋ dima ani. <sup>15</sup>Nin gen unjuden do mirak dima yopneŋ. Anej amin do but dasi galak tanj yomyom anjak anek gen bami gin yoneŋ. Yanj anek nin miŋat aminyo tebaisi agek Kristokon tagok tagok aneŋ. Kristo unjun paŋmuwukbi dakon busuŋi. <sup>16</sup>Unjun da busuŋnin yigakwan giptim dakon

† 4.2 Kol 3.12-13 ‡ 4.3 Kol 3.14-15 § 4.6 1Ko 12.6 ¶ 4.7 Ro 12.3,6 \* 4.8 Kap 68.18  
 †† 4.9 Jn 3.13 ††† 4.11 1Ko 12.28 †††† 4.13 Kol 1.28 ††††† 4.15-16 Kol 1.18; 2.19

sanjek morapni unjodon sanjekakwa giptim tebaisi toso. Anjakwan giptim diwat morap kalon kalon pini anjakwa amin do but dasi galak tan yomyom anpak anjakwa giptim tebaisi tagosok.

### Paŋmuwukbi anpak kalugi ban ani

<sup>17</sup>Do nak gen kinda dayik do nandisat. Amin Tagi da manon da gen tebaisi yan yosot: Ji Amin ņwakŋwari Kabi da anpak yokwi an unjodeŋ sanjek dima ani. Nandak nandakni wagilsi upbal tan, <sup>18</sup>ae nandak nandakni unun pilin tuk yombem. Butni unun sopbi, do nandak nandakni unun wagil minisi, ae Piŋkop dakon egip egip da wanŋa ekwan. <sup>19</sup>Anpak an unun do mayagi dima nandan. Yokwi ak do mibilisigwan pigeŋ an, ae anpak inani mibili mibili ak do buri pidon.

<sup>20-21</sup>Ji Yesu Kristo dakon gen kili nandawit yan nandisat. Ae gen bami Yesukon toso yan kili dayin dekwit. Nak nandisat, ji Amin ņwakŋwari Kabi dakon anpak unun dima ani do dayin dekwit. <sup>22</sup>z Jiyo kisi kalip but kalipmi dakon anpak ban awit. But kindap toptopmi da but kalipmi jonjiban wagil yokwisi asak. Do ji anpak kalipmi unun wiririk mudanek but nandak nandakji kulabik aba kalugisak. <sup>23</sup>a Nandak nandakji unun si kalugisak. <sup>24</sup>b Ji miŋat aminyo kalugi dagoni. Unun Piŋkop da iyi aban miŋat aminyo kalugi daganek Piŋkop iyi yombem an. Piŋkop unun kilegisi ae telagisi.

<sup>25</sup>c Do top anpak unun yipni. Ji morap kisi paŋmuwukbi diwari do gen bami gin yoyini. Nido, nin morap kisi giptim kalon dakon diwatni.

<sup>26</sup>d “Ji butjap nandan kan, kan kimotni. Yokwi di abam.” Ji butjap sigin nandan egakwa gildat dima pigisak. <sup>27</sup>Sunduk do yoma dima witaldalmi. <sup>28</sup>Kabo noknok kabo sanjek dima noni. Kisiŋi da pi bamisi an kimagek yo morapmi timigeŋ wadak wadak amin paŋpulugoni. <sup>29</sup>e Gen yokwi mibili mibili dima yoni. Amin alegi tagi paŋteban ani dakon gen baŋgin yoni. Gen unjoden nandan amin unun dakon butni paŋteban asak. <sup>30</sup>f Ji anpak yokwi anek Piŋkop dakon Telagi Wupni bupmi dima imni. Piŋkop da Telagi Wup damgut unun iyi dakon miŋat aminyosi ekwan dakon tilak. Ae bisap madepmon yokwikon ban timigeŋ pulugaŋ depjak yan unun da nolisak. <sup>31</sup>g Butjikon da nandaba yokwi tok, ae butjapmon da gen pap yogok, ae butjap, ae but sigok, ae yanba yokwi tok, ae anpak yokwi mibili mibili unun wagilsi yopman mudoni.

<sup>32</sup>h Paŋmuwukbi diwari do anpak tagisi an yomiŋek but dasi galak

y 4.17 Ro 1.21; 1Pi 1.14 z 4.22 Ro 8.13; Kol 3.9 a 4.23 Ro 12.2 b 4.24 WW 1.26; Kol 3.10 c 4.25 Sek 8.16; Kol 3.8-9 d 4.26 Kap 4.4; Jem 1.19-20 e 4.29 Kol 4.6 f 4.30 Ais 63.10; Ep 1.13-14; 1Tes 5.19 g 4.31 Kol 3.8 h 4.32 Mt 6.14; 18.22-35; Kol 3.12-13



taŋ yomni. Piŋkop da Kristo da manon diwarisi yopmaŋ damisak, yaŋ gin ji diwarini yopmaŋ yomni.

### Ji tenŋenikon egipni

**5** <sup>1</sup>Piŋkop da ji but dasi galak taŋ damisak. Anjakwan monji gwayonisi ekwaŋ, do anpak iyi asak uŋun baŋ ani. <sup>2</sup>Kristo da but dasi galak taŋ niminek nin paŋpulugok do anek iyi dakon egip egipni parekgit, yaŋ gin jiyo kisi amin do but dasi galak taŋ yomyom anpak baŋ yolek ani. Egip egipni uŋun paret kibaŋi tagisi naŋ yaŋ Piŋkop do parekgit.

<sup>3</sup>Ji yumabi anpak gat, ae anpak iŋani morap dimasi ani, ae amin dakon yo do pindak galaktok dimasi ani. Piŋkop dakon miŋat aminyo nin, uŋuden anpak dakon gen dimasi yoneŋ. <sup>4</sup>Gen iŋani dima yoni, ae nandaŋ kokwini tagi dima amin da gen yoŋ uŋudeŋ dima yoni, ae jigilagon da gen yokwi dima yoni. Anpak uŋuden nin da dimasi agagi. Piŋkop ya yaŋ iyineŋ uŋun da tagisi asak. <sup>5</sup>Yaŋsi nandani, yumabi anpak aŋ amin gat, ae anpak iŋani aŋ amin gat, ae pindak galaktok anpak aŋ amin, uŋuden amin kabi Kristo gat Piŋkop gat da kila amal da kagagwan aripmi dima pigini. Pindak galaktok anpak uŋun da kokup kidat gawak yomamaŋ yaŋ asak.

<sup>6</sup>Amin da anpak yokwi uŋun ani do nandaŋek top gen uŋun dayikdaŋ. Mani geni dima nandani. Anpak uŋuden dogin Piŋkop da amin geni dima guramikgaŋ uŋun do butjap madepsi nandaŋ yomisak. <sup>7</sup>Do uŋuden amin gat not dima anek egipni. <sup>8</sup>Nido kalip ji pilin tukgwan egipgwit, mani abisok Amin Tagi da tenŋenikon depgut, do ji tenŋeni dakon miŋat aminyo da yaŋ agipni. <sup>9</sup>Tenŋeni da anpak tagisi mibili mibili morap gat, anpak kilegi gat, ae gen bami gat paŋalon asak. <sup>10</sup>Amin Tagi da anpak si galak tosok uŋun wisin pindat do pi ani. <sup>11</sup>Ji pilin tuk dakon anpak aŋ amin gat gadat gadat dima ani. Anpak uŋuden da bami tagi dima toŋ. Ji da miŋat aminyo anpak uŋun yokwi yaŋ yoliba pindatni. <sup>12</sup>Anpak yokwi pasilikon da aŋ uŋun mayagisi, uŋun do dima yogogi. <sup>13</sup>Mani tenŋeni da anpak morap dakon mibili paŋalon aban nomansi tenŋenaŋ toŋ. <sup>14</sup>Ae tenŋeni da yo kinda aŋalon asak bisapmon, uŋun yo kisi amin da tagi pindari asak. Yaŋ do anek gen on tosok:

“Dipmin pokdol amin gak pidoki.

Kimoron da pidaŋaki Kristo da tenŋenaŋ gamjak.”

<sup>15</sup>Ji pilik bamokji dakon kila tebaisi aŋ kimotni. Amin nandaŋ kokwini mini da aripmon dima agipni, amin nandaŋ kokwini tagisi

i 5.1 Mt 5.48 j 5.2 TP 29.18; Ibr 10.10 k 5.5 1Ko 6.9-10; Kol 3.5 l 5.6 Ro 1.18; Kol 2.4,8 m 5.8 Jn 12.36; Ep 2.13; Kol 1.13; 1Pi 2.9 n 5.13 Jn 3.20-21 o 5.14 Ais 26.19; Ro 13.11 p 5.15-16 Kol 4.5

da aripmon agipni. <sup>16</sup>Abisok ji Piŋkop dakon pi ani dakon bisap. Mani abisok bisap ekwamaŋ uŋun bisap yokwi, do kaŋ kimotni. Bisap uŋun isal dogin di mudaŋban. <sup>17</sup>Nandaŋ kokwini tagi dima amin da aripmon dima agipni. Amin Tagi dakon galaktok uŋun pakyauŋi nandani. <sup>18</sup><sup>9</sup>Wain morapmi naŋek but upbal dima ani. Anpak uŋuden da ji paŋupbal aŋ. Piŋkop dakon Wupni yipba jikon tugosak. <sup>19</sup><sup>7</sup>Ae Piŋkop dakon miŋat aminyo diwari gat gen yoni bisapmon, kap papiakon kap toŋ gat, ae Piŋkop gawak imim dakon kap diwari gat, ae Telagi Wup da kap butjikon paŋalon asak, genji uŋun gat kisi timigeŋ yoni. Aŋek Amin Tagi do gen kagasi ae butjiyo kisi da kap yaŋ imni. <sup>20</sup><sup>8</sup>Ae Amin Taginin Yesu Kristo da manon da bisapmi bisapmi yo morap do Piŋkop Dat ya yaŋ iyin kimotni.

### Pol da miŋat eyo kili abi do yaŋit

<sup>21</sup><sup>t</sup>Ji Kristo do nandaba wukwan imiŋek notji gawak yomiŋ yomiŋ aŋek egipni. <sup>22</sup><sup>u</sup>Miŋat, ji Amin Tagi do gawat gawat aŋek nandaba wukwan imaŋ, yaŋ gin esi do yaŋ ginsi aŋek egipni. <sup>23</sup><sup>v</sup>Nido, Kristo da paŋmuwukbi dakon busuŋi yikdak, uŋun da tilak wili uŋun miŋatni dakon busuŋi egisak. Paŋmuwukbi uŋun Kristo dakon giptimi, ae Kristo da yokwikon baŋ timikgit. <sup>24</sup>Paŋmuwukbi uŋun Kristo do gawat gawat aŋek nandaba wukwan imiŋek ekwaŋ, yaŋ gin miŋat ji yo morapmon esi do yaŋ ginsi anyomni.

<sup>25</sup><sup>w</sup>Kristo da paŋmuwukbi do but dasi galak taŋ yomiŋek paŋpulgok do iyi dakon egip egipni parekgit, yaŋ gin wili ji miŋatji but dasi galak taŋ yomiŋ kimotni. <sup>26</sup><sup>x</sup>Pakbi gat ae geni gat baŋ Kristo da paŋmuwukbini sugaŋban telagisi awit. <sup>27</sup><sup>y</sup>Paŋmuwukbi sugaŋban iyi da dabilon wagil tagisisi asak do aŋek yaŋ agit. Aban jimjimi mini ae garak bo ae yo uŋuden minisi aŋek telagi ae gulusuŋni mini egipni yaŋ do agit. <sup>28</sup>Wili ji disi dakon giptim do galak toŋ, yaŋ gin miŋatji but dasi galak taŋ yomni. Amin kinda miŋatni do but dasi galak taŋ imisak, uŋun amin da iyi do yaŋ gin nandisak. <sup>29</sup>Nin nandamaŋ, amin kinda iyi dakon giptim tim do uwal dima aŋ imgut. Giptimni jap imiŋek kilani tagisi asak. Kristo da paŋmuwukbi do yaŋ gin asak, <sup>30</sup>nido nin Kristo dakon giptim dakon kandap ae kisit dabilyoni. <sup>31</sup><sup>z</sup>Piŋkop dakon papia da yaŋ yosok:

“Yaŋ do aŋek amin kinda meŋi datyoni yopmaŋ degek miŋatni gat gadaŋbal bamori da giptim kalonji gin asak.”

<sup>32</sup><sup>a</sup>Gen pasili on dakon mibili uŋun madepsi, mani nak uŋun yaŋ yosot, gen on Kristo gat paŋmuwukbini gat do yosok. <sup>33</sup>Mani wili kalon kalonji da disi do but dasi galak toŋ, yaŋ gin miŋatji do yaŋ gin nandani. Ae miŋat ji esi do nandaba wukwan yomni.

---

¶ 5.18 Lk 21.34    ¶ 5.19 Kol 3.16    § 5.20 Kol 3.17    † 5.21 1Pi 5.5    ‡ 5.22 Kol 3.18; 1Pi 3.1  
 † 5.23 1Ko 11.3; Ep 1.22    ¶ 5.25 Kol 3.19; 1Pi 3.7    × 5.26 Tit 3.5    † 5.27 2Ko 11.2;  
 Kol 1.22    † 5.31 WW 2.24; Mt 19.5    † 5.32 PA 19.7

**Pol da miñat monjiyo gat ae meñ datyo gat do yagit**

**6** <sup>1</sup> Miñat monjiyo, ji meñ datyosi dakon gen guramik kimotni. Nido ji Amin Tagikon kili gadawit, ae anpak unun ji da ani do nandisak. <sup>2</sup> Piñkop gen papiakon gen yañ tosok, “Gak meñ datgo dakon piñbinisi egi kimagek geni guramiki.” Gen teban yañ teban tokni toñ kabikon da on da mibiltok asak. <sup>3</sup> Yañ teban tok gen yañ tosok:

“Gak yañ abi kañ, pi morap akdisal unun abi bami tagisi tokdañ.  
Ae on miktimon bisap dubak egipdisal.”

<sup>4</sup> Dat, ji miñat monjiyosi dakon buri dima sugoni. Miñat monjiyosi pañmilip aņek Amin Tagi dakon gen yoyiñdetni.

**Pol da oman monji gat mibiltok amin gat do yagit**

<sup>5</sup> Oman monji, ji mibiltok aminji do pasalek piñbini egek geni guramitni. Kristo dakon gen but dasi nandaņek guramikgañ, unun da tilak geni guramitni. <sup>6</sup> Unun da amin tagisi yañ dandani yañ do kapmatjok egipni bisapmon pi tagisi di abam. Dima. Nin Kristo iyi dakon oman monji gin ekwamañ yañ nandaņek butjikon da Piñkop dakon galaktok yol do but galaksi nandani. <sup>7</sup> Ji but dasi nandaņek pi ani. Ji amin dakon pi ani bisapmon nin Amin Tagi dakon pi bañ amañ yañon da nandaņek ani. <sup>8</sup> Nandani, oman monji bo oman monji dima mani amin kindi pi tagisi asak kañ, Amin Tagi da yumañ nogi tagisi imdisak.

<sup>9</sup> Ae mibiltok amin jiyo kisi oman monjisi do anpak tagisi aņ yomni. Pasol pasol yomyom anpak unun yipni. Amin Tagi Kwen Kokup egisak unun ji ae ununyo kisi dakon Amin Tagi. Unun da miñat amin morapyo kisi dakon anpak tilak kaloņikon gin kokwinikdak.

**Pañmuwukbi unun emat amin yombem**

<sup>10</sup> Nak geno wasip ak do yañ yosot. Ji Amin Tagikon gadawit, do tapmim madep morapni do nandaņek tebaisi atni. <sup>11</sup> Piñkop da emat dakon yo kabi nimisak unun pani. Paņek tebaisi agek Sunduk dakon paņkewal mibili mibili unun tagi pabiñ yopni.

<sup>12</sup> Pakyaņsi nandani, nin amin gat emat dima wamaņgamañ. Nin wup yokwisi tapmimi toñ gat, ae koñ miktim kila aņ gat, ae yo tapmimi toñ mibili mibili on pilin tuk tosok bisapmon miktim kila aņ, ae koñ kwen ekwañ gat emat amañ. <sup>13</sup> Do ji Piñkop da emat dakon yo damisak unun kisi morap timigek bisap yokwikon emaron tebai tagi atni. Ae emat dagosak bisapmon ji tebai sigin atni.

<sup>b</sup> 6.1 Kol 3.20   <sup>c</sup> 6.2-3 GT 5.16   <sup>d</sup> 6.4 Kap 78.4; YT 22.6; Kol 3.21   <sup>e</sup> 6.5 Kol 3.22-23; Tit 2.9-10; 1Pi 2.18   <sup>f</sup> 6.8 2Ko 5.10; Kol 3.24-25   <sup>g</sup> 6.9 Ro 2.11; Kol 4.1   <sup>h</sup> 6.11 Ro 13.12; 2Ko 10.4   <sup>i</sup> 6.12 1Pi 5.8-9

<sup>14</sup>Ji tebai atni. Anek gen bami nan boban napmi do wamni. Anek anpak kilegi ban pibit kutnok yan pani. <sup>15</sup><sup>k</sup>Ae Pinokop da but yawot nimisak unun dakon Gen Bin Tagisi yan tenjenoni. Ununan kandap gwil yan pani. <sup>16</sup>Ji emat dakon yo morap unun timigek, nandan gadatyo kisi abidanba unun da pasikji asak. Anek Yokwi Ami unun dakon dikdik morapni milen asipmi ton ji yaman damisak unun tagi pabin yopni. <sup>17</sup><sup>l</sup>Pinokop da yokwikon ban kili timikgit yan nandani. Unun nandak nandak da busun kutnokji asak. Yan anek Telagi Wup dakon emat agak siba abidoni, unun Pinokop dakon gen. <sup>18</sup><sup>m</sup>Telagi Wup da tapmimon bisapmi bisapmi bisit an kimotni. Bisit mibili mibili ak do pi tebaisi anek Pinokop da ji panpulugosak do bisit iyini. Kila tebai anek unun anpak dima yipman detni. Bisapmi bisapmi Pinokop dakon minat amin morapyoni do bisit ani.

<sup>19</sup><sup>n</sup>Ae Pinokop bisit iyinba nakyo kisi anpulugosak. Anakwan geni nak da gen kagakon yipmanakwan pasol pasol abin yipmanek Gen Bin Tagisi dakon gen pasili yan tenjenoken. <sup>20</sup><sup>o</sup>Pinokop da iyi Gen Bin Tagisi on yan tenjenoken do yabekban kigim. Ae unun dogin anek nak dam tebanon yigek nap tebanban nak anteban awit. Nak Gen Bin Tagisi yoken dakon pi tosok, do Pinokop bisit iyinba nak anteban aban pasol pasol abin yipmanek minat aminyokon madepsi yan tenjenoken. Pinokop da yan si abej do nandisak.

### **Pinokop da panpulugosak do Pol da bisit agit**

<sup>21</sup><sup>p</sup>Tikikus da pi nian agim ae nian egisat dakon but piso gen dayisak. Tikikus unun notninsi, ae Amin Tagi dakon oman amini tagisi kind. <sup>22</sup>Unun yabekgo jikon obinakwan nin nian ekwaman unun dakon geni dayisak, ae butji panteban asak, mibili yan do yabekdat.

<sup>23</sup>Pinokop Dat gat ae Amin Tagi Yesu Kristo gat da panmuwukbi morap ji dakon butji panyawot aban yawori tosak. Anek unun da pantagap aban nandan gadat tebai anek amin do but dasi galak tan yomni. <sup>24</sup>Pinokop da minat amin morapyo Amin Tagi Yesu Kristo but dasi galak tan imin kimagek dima yipman dekgan unun do nandan yawotni yomjak.

---

j **6.14** Ais 11.5; 59.17; 1Tes 5.8    <sup>k</sup> **6.15** Ro 10.15    <sup>l</sup> **6.17** Ibr 4.12    <sup>m</sup> **6.18** Lk 18.1; Kol 4.2; 1Tes 5.17    <sup>n</sup> **6.19** Kol 4.3-4; 2Tes 3.1    <sup>o</sup> **6.20** 2Ko 5.20; Plm 9    <sup>p</sup> **6.21** Ya 20.4; Kol 4.7-8; 2Ti 4.12